

«Jeu havess buca sminau ch'ei seigi aschi grev d'esser schefredactor»

La «Truvitga» ei ina gasetta che vegn realisada mintg'onn dalla classa partenta dil Consorzi da scola Sumvitg-Trun e quei schai gia dapi diesch onns ella responsabladad da tuttas scolaras e scolars. Uonn ei quei auter, Dea Monn da Sumvitg ei gl'empren schefredactor e responsabels che «sia» gasetta cumpari ad uras.

SUSI ROTHMUND/FMR

Las scolaras ed ils scolars dalla tiarza reala e secundara dil Consorzi da scola Sumvitg-Trun selegran silla fin digl'onn da scola. Avon ch'igl ei aschi lunsch han ei denton aunc da finir lur lavurs da project. Quella realiseschan ei duront il rom individualisaziun ed el temps liber. Duas uras ad jamna stattan a disposiziun en scola e leu survegnan ei era il support dil scolast da classa *Armon Bearth* e dil scolast dil fatg *Clau Maissen*. Fertion ch'ils ins ein sedecidi per ina lavur manuala han auters elegiu ina lavur en scret ed era ina mischeida da pliras variantas ei pusseivla.

Nossa historia

La lavur da project da *Dea Monn* ei la «Truvitga 2022». Igl ei denton buca propi stau sia idea da daventar schefredactor da quella, mobein l'idea dil scolast *Armon Bearth*. «All'entschatta erel jeu buc fetg incantaus da quella proposta, mobein plitost schocaus. Suenter haver giu endamen cun miu bab che ha ina fatschenta per publicitad, design e grafica sundel sedeclaus promts da realisar la gasetta da scola. Il bab cusseggia e segida empau aschia ch'jeu hai ussa plascher da miu project», declara il scolast che legia e scriva bugen. All'entschatta seigi ei stau empau stufi. Entochen ch'el hagi ina ga giu cun «nossa historia – annada 2006» in fil tgeitschen per la gasetta ed era gest in suttel. Quell'idea sebase sin ina viseta da *Flavio Huonder*, in dils responsabels dalla pagina www.nossaistorgia.ch alla tiarza superiura a Trun. Leu ha el presentau intent e finamira da quella pagina cun cuntegns historics. Ella «Truvitga» cun 40 – 44 paginas vegnan lecturas e lecturs ad anflar in'intervista che Dea Monn ha fatg cul curatur e moderatur da nossaistorgia.ch. Plinavon intervistas ch'el ha fatg cun scolastas e scolasts e constatau: «Enqual risposta legra ha fatg surstar mei, el mintgadi da scola paran ei magari pli serius», manegia il schefredactor. Secapescha s'auda era la historia dall'annada 2006 cun dabia fotografias ella gasetta che duei esser prompta per la stampa en rondund sis jamnas.

Plascher

Als conscolars ha Dea Monn dau il pensum da purtrelar in l'auter e mintgina e mintgin duei scriver ina cuorta poesia. Ultra da quei han tuts mirau per sponsurs e Dea Monn ei surstaus che tontas fatschentas e privats ein stai promts da sustener la gasetta. Mo co sesenta il giuvenotter da delegar lavurs? «Ei fa

bunamein in tec plascher d'astgar delegar e cumandar sils conscolars», di el cun in surrir ed aschunta: «Jeu havess bu sminau ch'ei seigi aschi grev d'esser schefredactor. Igl ei da rispunder da tuttas damondas.» E tgei qualitäts drov'in schefredactor tenor Dea Monn? «Ei drova ina buna purziun aviartadad, in bien cumportament en contact culla glieud ed igl ei segir bien d'esser marveglius.»

Massa «sururas»

Dea Monn sfeglia bugen atras mintga di La Quotidiana, quei ch'interessescha el vegn legiu

ed era La Tuatschina s'auda tier sia lectura. Ha il schefredactor dalla «Truvitga» ambiziunals en connex cullas medias? «Na, jeu fetschel in emprendissadi da bostger», rispunda el e ri. El savessi buca s'imaginar da luvrar gl'entir di en in biro. «Ins sa denton mai tgei che schabegia egl avegnir», manegia el. En siu job da cauredactor ha el en mintgacass da far massa «sururas» per vegnir vinavon. «Jeu impundel mintga fin d'jamna dabia temps per la gasetta ed era duront las vacanzas ei quei stau il cass. Mia finamira ei da far tut aschi perfetg sco pusseivel», declara Dea Monn.



Flurina Defuns realisescha in cudisch per affons.

Dad étgs entochen mobiglias e skis

Era ils conscolars da Dea Monn ein actualmein occupai cun interessantas lavurs da project: *Jana Felber* s'occupa da products naturals ord jarvas; *Selina Tuor* sefatschenta da La Conditoria a Sedrun e ses products; *Sina Mara Candinas* ei stada la stad ad alp e sia tematica ei la lavur dalla signuna; *Flurina Defuns* realisescha in cudisch da praulas; *Jeremy Lombriser* producescha in film in da publicitad per raviolis; *Alissia Candinas* ha elegiu sias gagginas sco tema dalla lavur da project; *Martina Beeli* construescha ina meisa da scriver ord lenn; *Andrin Wolf* baghegia ina «Seifenkiste»; *Sandro Sossai* construescha ina lontscha e la pesca ei siu tema e *Sandro Flepp* s'occupa cun differentas metodas da buglir e buglia sez ensem en ina cazzola da metal; *Maria Bosshard* fa ina cruna ord lenn e *Duri Pelican* construescha in pèr skis da lenn.